

四庫全書

史部

欽定四庫全書

史部

歷代名臣奏議卷一百五十四

詳校官編修臣周瓊

編修臣張謙勛

總校官編修臣王燕緒

校對官編修臣盧遂

謄錄監生臣趙位堂

欽定四庫全書

歷代名臣奏議卷一百五十四

明

楊士奇等撰

知人

齊桓公未管仲病公問羣臣誰可相者管仲曰知臣莫若君公曰易牙何如對曰殺子以適君非人情不可公曰開方何如對曰倍親以適君非人情難近公曰豎刁何如對曰自宮以適君非人情難親管仲死公用三子

三子專權公卒易牙入與豎刁因內寵殺羣吏而立公子無詭宋伐齊齊人殺無詭立孝公孝公卒公弟潘因開方殺孝公子而立潘

魯哀公問於孔子曰當今之時君子誰賢對曰衛靈公公曰吾聞之其閨門之內姑姊無別對曰臣觀於朝廷未觀於堂陛之間也靈公之弟曰公子渠牟其知足以治千乘之國其信足以守之而靈公愛之又有士曰王林國有賢人必進而任之無不達也不能達退而與分

其祿而靈公尊之又有士曰慶足國有大事則進而治之無不濟也而靈公說之史鰌去衛靈公卽舍三月琴瑟不御待史鰌之入也而後入臣是以知其賢也

衛侯在楚北宮文子見令尹圉之威儀言於衛侯曰令尹其將不免詩云敬慎威儀維民之則令尹無威儀民無則焉民所不則以在民上不可以終公曰善哉何謂威儀對曰有威而可畏謂之威有儀而可象謂之儀君有君之威儀其臣畏而愛之則而象之故能有其國家

今聞長世臣有臣之威儀其下畏而愛之則而象之故能守其官職保族宜家順是以下皆如是是以上下能相固也衛詩曰威儀棣棣不可選也言君臣上下父子兄弟内外大小皆有威儀也周詩曰朋友攸攝攝以威儀言朋友之道必相教訓以威儀也故君子在位可畏施舍可愛進退可度周旋可則容止可觀作事可法德行可象聲氣可樂動作有文言語有章以臨其下謂之有威儀也

楚莊王時有善相人所言無遺策聞於國王見而問其情對曰臣非能相人能觀人之交也布衣也其交皆孝悌篤謹畏令如此者其家必日益身必日安此所謂吉人也官事君者也其交皆誠信而好善如此者事君日益官職日進此所謂吉人也主明臣賢左右多忠主有失皆敢分爭正諫如此者國日安主日尊天下日富此之謂吉主也臣非能相人能觀人之交也莊王曰善於是乃招聘四方之士夙夜不懈遂得孫叔敖將軍子重

之屬以備卿相遂成霸功詩曰濟濟多士文王以寧此之謂也

魏文侯謂李克曰先生嘗教寡人曰家貧則思良妻國亂則思良相今所置非成則璜二子何如李克對曰臣聞之卑不謀尊疎不謀戚臣在闕門之外不敢當命文侯曰先生臨事勿讓李克曰君不察故也居視其所親富視其所與達視其所舉窮視其所不為貧視其所不取五者足以定之矣文侯曰先生就舍寡人之相定矣

文侯與田子方飲酒而稱樂文侯曰鐘聲不比乎左高
田子方笑文侯曰奚笑子方曰臣聞之君明則樂官不
明則樂音今君審於聲臣恐君之聒於官也文侯曰善
敬聞命

漢文帝立召田叔問曰公知天下長者乎對曰臣何足
以知之上曰公長者也宜知之叔頓首曰故雲中守孟
舒長者也是時孟舒坐虜大入塞盜劫雲中尤甚免上
曰先帝置孟舒雲中十餘年矣虜曾一入孟舒不能堅

守毋故士卒戰死者數百人長者固殺人乎公何以言
孟舒為長者也叔叩頭對曰是乃孟舒所以為長者也
夫貫高等謀反上下明詔趙有敢隨張王罪三族然孟
舒自髡鉗隨張王敖之所在欲以身死之豈自知為雲
中守哉漢與楚相距士卒罷敝匈奴冒頓新服北夷來
為邊害孟舒知士卒罷敝不忍出言士爭臨城死敵如
子為父弟為兄以故死者數百人孟舒豈故驅戰之哉
是乃孟舒所以為長者也於是上曰賢哉孟舒復召孟

舒以為雲中守

武帝征和元年趙王彭祖卒彭祖所幸淖姬生男號淖子時淖姬兄為漢宦者上召問淖子何如對曰為人多欲上曰多欲不宜君國子民間武始侯昌曰無咎無譽上曰如是可矣遣使立昌為趙王

漢昭烈皇帝領益州牧時以諸葛亮為軍師將軍以蔣琬為廣都長不治大怒亮請曰蔣琬社稷之器非百里才也其為政以安民為本不以修飾為先願主公重加

察之帝雅敬亮乃不加罪許靖為蜀郡太守成都將潰靖謀出降薄之不用法正曰天下有獲虛名而無其實者許靖是也然今始創大業天下之人不可戶說宜加敬重以慰天下之望乃禮而用之

魏明帝景初二年詔中都侯孫資曰吾年稍長又歷觀書傳中皆歎息無所不念圖萬年後計莫過使親人廣據職勢兵任又重今射聲校尉缺久欲得親人誰可用者資曰陛下思深慮遠誠非愚臣所及書傳所載皆聖

聽所究向使漢高不知平勃能安劉氏孝武不識金霍
付屬以事殆不可言文皇帝始召曹真還時親詔臣以
重慮及至晏駕陛下即祚猶有曹休內外之望賴遭日
月銜勒不傾使各守分職纖芥不間以此推之親臣貴
戚雖當據勢握兵宜使輕重素定若諸侯典兵力均衡
平寵齊愛等則不相為服不相為服則意有異同今五
營所領見兵常不過數百選授校尉如其輩類為有疇
疇至於重大之任能有所維綱者宜以聖恩簡擇如平

勃金霍劉章等一二人漸殊其威重使相鎮固於事為
善帝曰然如卿言當為吾遠慮所圖今日可叅平勃侔
金霍雙劉章者其誰哉資曰臣聞知人則哲惟帝難之
唐虞之聖凡所進用明試以功陳平初事漢祖絳灌等
謗平有受金盜嫂之罪周勃以吹簫引彈始事高祖亦
未知名也高祖察其行跡然後知可以付與大事霍光
給侍中二十餘年小心謹慎乃見親信日碑降人以至
孝質直特見擢用左右尚曰妄得一降人而重貴之平

勃雖安漢嗣其終勃被反名平劣自免於呂須之讒上官桀桑弘羊與霍光爭權幾成禍亂此誠知人之不易為臣之難也又所簡擇當得陛下所親當得陛下所信誠非愚臣之所能識別

帝問司徒陳矯司馬公忠貞可謂社稷之臣乎矯曰朝廷之望社稷未之知也

後魏高祖引見王公已下於信堂高祖曰政雖多途治歸一體朕每蒙慈訓猶自昧然誠知忠佞有損益而

未識其異同恒懼忠貞見毀佞人便進寤寐思此如有
隱憂國彥朝賢休戚所共宜辨斯真偽以釋朕懷尚書
游明根對曰忠佞之士實亦難知依古爵人先試之以
官官定然後祿之三載考績然後忠佞可明尚書中書
監高閭曰竊謂素盞徹慎夫人席是其忠譖殺晁錯是
其佞若以二人言之望之為忠石顯是佞高祖曰自非
聖人忠佞之行時或互有但忠功顯即謂之忠佞迹成
斯謂之佞史官據成事而書於今觀之有別明矣朕所

問者未然之前卿之所對已然之後問曰佞者飾智以
行事忠者發心以附道譬如玉石皦然可知高祖曰玉
石同體而異名忠佞異名而同理求之於同則得其所
以異尋之於異則失其所以同出處同異之間交換忠
佞之境豈是皦然易明哉或有託佞以成忠或有假忠
以飾佞如楚子綦後事顯忠初非佞也問曰子綦諫楚
初雖隨述終致忠言此適欲幾諫非為佞也子綦若不
設初權後忠無由得顯

唐太宗貞觀六年謂魏徵曰古人云王者須為官擇人不可造次即用朕今行一事則為天下所觀出一言則為天下所聽用得正人為善者皆勸誤用惡人不善者競進賞當其勞無功者自退罰當其罪為惡者戒懼故知賞罰不可輕行用人彌須慎擇徵對曰知人之事自古為難故考績黜陟察其善惡今欲求人必須審訪其行若知其善然後用之設令此人不能濟事只是才力不及不為太害誤用惡人假令彊幹為害極多但亂代

惟求其才不顧其行太平之時必須才行俱兼始可任用

十一年徵又上疏曰臣聞為人君者在乎善善惡惡近君子而遠小人善善明則君子進矣惡惡著則小人退矣近君子則朝無秕政遠小人則聽不私邪小人非無小善君子非無小過君子小過盖白璧之微瑕小人小善乃鉛刀之一割鉛刀一割良工之所重重片善不足以掩衆惡也白玉微瑕善賈之所棄棄小疵不足以妨

大義也。小人之小善，謂之善；善君子之小過，謂之惡。惡此則蒿蘭同嗅，玉石不分。屈原所以沉江，卞和所以泣血也。既識玉石之分，又辨蒿蘭之臭，善而不能進，惡而不能去。此郭氏所以為墟史魚所以為恨也。陛下聰明神武，天資英睿，志存汎愛，引納多途。好善而不甚擇人，疾惡而未能遠佞。又出言無隱，疾惡太深。聞人之善，或未全信；聞人之惡，以為必然。雖有獨見之明，猶恐理或未盡。何則？君子揚人之善，小人訐人之惡。聞惡必信，則

小人之道長矣聞善或疑則君子之道消矣為國者急於進君子退小人乃使君子道消小人道長則君臣失序上下相隔亂亡不卹將何以求夫以善相成謂之同德以惡相濟謂之朋黨今則清濁共流善惡無別以告訐為誠直以同德為朋黨以之為朋黨則謂事無可信以之為誠直則謂言皆可取此君恩所以不給於下臣忠所以不達於上大臣不能辨正小臣莫之敢論近遠承風混然成俗非國家之福非為治之道適足以長姦

邪亂視聽使人君不知所信臣下不得相安若不遠慮深絕其源則後患未之息也今行之而未敗者由乎君有遠慮雖失之於始必得之於終故若時逢少墮往而不返雖欲悔之必無所及既自失以傳諸後嗣復何以垂法將來且夫進善黜惡施於人者也以古作鑒施於已者也鑒貌在乎止水鑒已在乎哲人能以古之哲王鑒於已之行事則貌之妍媸宛然在目事之善惡自得於心無勞司過之史不假芻蕘之議巍巍之功日著赫

赫之名弘遠為人君可不務乎

徵論人臣有六正六邪上疏曰臣聞知臣莫若君知子莫若父父不能知其子則無以睦一家君不能知其臣則無以齊萬國萬國咸寧一人有慶必藉惟良作弼俊又在官則庶績其凝無為而化矣故堯舜文武見稱前載咸以知人則哲多士盈朝元凱翼翼巍巍之功周召光煥乎之美然則四岳九官五臣十亂豈惟生之於曩代而獨無於當今者哉在乎求與不求好與不好耳何以

言之夫美玉明珠孔翠犀象大宛之馬西旅之獒或無足也或無情也生於八荒之表塗遙萬里之外重譯入貢道路不絕者何哉蓋由中國之所好也況從仕者懷君之榮食君之祿率之以義將何往而不至哉臣以為與之為忠則可使同乎龍逢比干矣與之為孝則可使同乎曾參子騫矣與之為信則可使同乎尾生展禽矣與之為廉則可使同乎伯夷叔齊矣然而今之群臣罕能貞白卓異者求之不切勵之未精故也若勗之以公

忠期之以遠大各有職分得行其道貴則觀其所舉富則觀其所養居則觀其所好習則觀其所言窮則觀其所受賤則觀其所不為因其材以取之審其能以任之用其所長掩其所短進之以六正戒之以六邪則不嚴而自勵不勸而自勉矣故說苑曰人臣之行有六正六邪行六正則榮犯六邪則辱何謂六正一曰萌芽未動形兆未見昭然獨見存亡之機得失之要預禁乎未然之前使主超然立乎榮顯之處如此者聖臣也二曰虛

心盡意日進善道勉主以禮義諭主以長策將順其美
匡救其惡如此者良臣也三曰夙興夜寐進賢不懈數
稱往古之行事以厲主意如此者忠臣也四曰明察成
敗早防而救之塞其間絕其源轉禍以為福使君終以
無憂如此者智臣也五曰守文奉法任官職事不受贈
遺辭祿讓賜飲食節儉如此者貞臣也六曰國家昏亂
所為不諛敢犯主之嚴顏面言主之過失如此者直臣
也是謂六正何謂六邪一曰安官貪祿不務公事與代

浮沈左右觀望如此者具臣也二曰主所言皆曰善主
所為皆曰可隱而求主之所好而進之以快主之耳目
偷合苟容與主為樂不顧後害如此者諛臣也三曰內
實險詖外貌小謹巧言令色妬善嫉賢所欲進則明其
美隱其惡所欲退則明其過匿其美使主賞罰不當號
令不行如此者奸臣也四曰智足以飾非辯足以行說
內離骨肉之親外構亂於朝廷如此者讒臣也五曰專
權擅勢以輕為重私門成黨以富其家擅矯主命以自

顯貴如此者賊臣也六曰諂主以邪佞陷主於不義朋黨比周以蔽主明使黑白無別是非無門使主惡布於境內聞於四隣如此者亡國之臣也是謂六邪賢臣處六正之道不行六邪之術故上安而下理生則見樂死則見思此人臣之術也記曰權衡誠懸不可欺以輕重繩墨誠陳不可欺以曲直規矩誠設不可誣以圓方君子審禮不可誣以奸詐然則臣之情偽知之不難矣又設禮以待之執法以御之為善者蒙賞為惡者受罰安

敢不企及乎安敢不盡力乎國家思欲進忠良退不肖
十有餘載矣徒聞其語不見其人何哉蓋言之是也行
之非也言之是則出乎公道行之非則涉乎邪徑是非
相亂好惡相攻所愛雖有罪不及於刑所惡雖無辜不
免於罰此所謂愛之欲其生惡之欲其死者也或以小
惡棄大善或以小過忘大功此所謂君之賞不可以無
功求君之罰不可以有罪免者也賞不以勸善罰不以
懲惡而望邪正不惑其可得乎若賞不遺疎遠罰不阿

親貴以公平為規矩以仁義為準繩考事以正其名循名以求其實則邪正莫隱善惡自分然後取其實不向其華處其厚不居其薄則不言而化期月而可知矣若徒愛美錦而不為人擇官有至公之言無至公之實愛而不知其惡憎而遂忘其善循私情以近邪佞背公道而遠忠良夙夜不怠勞神苦思將求至理不可得也書奏太宗甚嘉納之

刑部尚書張亮坐謀反下獄詔令百官議之多言亮當

誅唯殿中少監李道裕奏亮反形未具明其無罪太宗
既盛怒竟殺之俄而刑部侍郎有闕令宰相妙擇其人
累奏不可太宗曰吾已得其人也往者李道裕議張亮
云反形未具可謂公平矣當時雖不用其言至今追悔
遂授道裕刑部侍郎

二十一年太宗在翠微宮授司農卿李緯戶部尚書房
玄齡是時留守京都曾有自京師來者太宗問曰玄齡
聞李緯拜尚書如何對曰玄齡但云李緯大好髭鬚更

無他語由是改授緯洛州刺史

太宗嘗從容問揚州都督長孫無忌曰朕聞君聖臣直人常苦不自知公宜面攻朕得失無忌曰陛下神武聖文冠卓千古性與天道非臣等愚所及誠不見有所失帝曰朕冀聞過公等乃相諛悅朕當評公等可否以相規何如皆拜謝上曰高士庶心術警悟臨難不易節所乏者骨鯁耳唐儉有辭善和斛人酒杯流行發言可意事朕二十年未嘗一言國家事楊師道性謹審自能無

過而懦不更事緩急非可倚岑文本敦厚文章論議其所長也謀常經遠自當不負於物劉洎堅正其言有益不輕然諾於人能自補闕馬周敏銳而正評裁人物直道而行所任皆稱朕意褚遂良鯁亮有學術竭誠親於朕若飛鳥依人自加憐愛無忌應對機敏善避嫌求於古人未有其比揔兵攻戰非所善也

太宗以王珪善人物且知言因謂曰卿標鑒通晤為朕言玄齡等材且自謂孰與諸子賢對曰孜孜奉國知無

不為臣不如立齡兼資文武出將入相臣不如靖敷奏
詳明出納惟允臣不如彥博濟繁治劇衆務畢舉臣不
如胄以諫諍為心恥君不及堯舜臣不如徵至激濁揚
清疾惡好善臣於數子有一日之長帝稱善而立齡等
亦以為盡已所長謂之確論

肅宗乾元元年張鎰聞史思明請降上言思明凶險因
亂竊位人面獸心難以德懷願勿假以威權又言滑州
防禦使許叔冀狡猾多詐臨難必變請徵入宿衛時上

已寵納思明會中使自范陽及白馬來皆言思明叔冀忠懇可信上以鎬為不切事機罷為荊州防禦使

代宗大歷十三年上召李泌入見詔以元載事曰與卿別八年乃能除此賊不然幾不見卿對曰陛下知羣臣有不善則去之含容太過故至於此上因言路嗣恭初平嶺南獻琉璃盤徑九寸朕以為至寶及破載家得嗣恭所遺載盤徑尺當議罪之泌曰嗣恭為人小心善事人精勤吏事而不知大體昔為縣令有能名陛下未暇

知之而為載所用故為之盡力陛下誠知而用之彼亦為陛下盡力矣且嗣恭新立大功陛下豈得以琉璃盤罪之邪上意乃解以嗣恭為兵部尚書

德宗興元元年議者或言韓滉聚兵修城陰蓄異志上疑之以問李泌對曰滉公忠清儉貢獻不絕鎮撫江東盜賊不起所以修城為迎扈之備耳此乃人臣忠篤之慮奈何更以為罪乎上曰外議洶洶卿弗聞乎對曰臣固聞之其子臯為郎不敢歸省正以謗語沸騰故也退

遂上章請以百口保滉

德宗常從容言盧杞清介敢言然少學不能廣朕以古道人皆指其姦而朕不覺也中書侍郎同中書門下平章事李泌對曰陛下能覺杞之惡安致建中禍邪李揆和蕃顏真卿使希烈其害舊德多矣又楊炎罪不至死杞擠陷之而相關播懷光立功逼使其叛此欺天也帝曰卿言誠有之然楊炎視朕如三尺童子有所論奏可則退不許則辭官非特杞惡之也且建中亂卿亦知桑

道茂語乎乃命當然對曰夫命者已然之言主相造命不當言命言命則不復賞善罰惡矣桀曰我生不有命自天武王數紂曰謂已有天命君而言命則桀紂矣帝曰朕請不復言命

時議者多以李勉大梁失守不應尚為相李泌言於上曰李勉公忠雅正而用兵非其所長且大梁不守將士棄妻子而從之者殆二萬人足以見其得衆心矣且劉洽出勉麾下勉悉衆以授之卒平大梁亦勉之功也上

乃命勉復位

翰林學士陸贄奉天論解蕭復狀奏曰右冀寧奉宣聖
旨緣國家賦稅多出江淮既未收復京城恐遠路傳說
過甚所以欲得遣一大臣往彼宣慰以安遠近之情初
欲簡擇此使並先共宰相商量皆云蕭復久任江外刺
史諳彼事宜又就宰相之中名望最重令其往彼宣慰
人必望風悅服其時蕭復亦自見此商議更無異同朕
猶不能自斷遂喚諸朝士班次對見一一親向說宣慰

之意問其穩便已否皆云至要並無異詞朕所以更不疑惑已與擇得發日及其臨行從一等却論奏欲得且留蕭復又頻有朝官上封事亦與從一等意同朕忽見此翻覆非常悵恨數日思量不測其故意者必是蕭復計會遣其論奏蕭復又有何事苦欲得住其意深不可會卿比來諳此人性行否兼與朕子細思料若不肯去其意何在者蕭復往年曾任常州刺史臣其時寄住常州首尾二年閱其理行及到京邑多與往來歲月滋深

情意相得復之志性臣則備諳本是貴門又聯戚屬痛
自脩勵慕為清貞矯枉太深時或過當論經義則以守
死善道執心不回為本議人物則以魏元忠宗璟為師
已之所行皆欲盡善故涉好名之累亦無應變之才用
雖不周行則可保至如二三爽德翻覆挾姦復之為人
必不至是安有親承計議退自變渝私誘官僚曲令干
說是同兒戲非近人情雖甚狂愚猶應不敢若稍恭慎
固當不為況乃見稱名流獲踐清貫備股肱之任承渥

澤之私何心何顏忍至於此假令蕭復之意或欲逗留
在於從一之徒寧肯附會臣緣自到行在常居禁中向
外事情視聽都絕忽承顧問莫測端由陛下必欲研窮
斯理不為難察初舉蕭復充使本是從一等商量後請
蕭復不行又是從一等論奏一矛一楯理必有歸或遣
或留意將安在但垂睿詰孰敢面謾蕭復若相屬求則
從一等何容為隱從一等儻自迴互則蕭復不當受疑
陛下奚憚而不辯明乃直為此悵悵也夫明則罔惑辯

則罔寃惑莫甚於逆詐而不與明寃莫痛於見疑而不
獲辯是使情偽相揉忠邪靡分茲實居上御下之要樞
惟陛下留意幸察謹奏

憲宗御延英殿與宰臣言向外人言朋黨頗甚如何武
元衡李吉甫未對而李絳奏曰朋黨之稱為臣也臣歷
觀自古及今帝王最惡者是朋黨奸人能揣知上旨非
言朋黨不足以激怒主心故小人諧毀賢良必言朋黨
尋之則無迹言之則可疑所以構陷之端無不言朋黨

者夫小人懷私常以利動不顧忠義自成朋黨君子以忠正為心以懲勸為務不受小人之佞不遂奸人之利自然為小人所嫉譖毀百端者蓋緣求無所獲取無所得故也忠正之士直道而行不為諂諛不事左右明主顧遇則進疑阻則退不為他計苟安其位以此常為奸邪所構以其無所入也夫聖賢合跡千載同符忠正端慤之人所以知獎亦是此類是同道也非為黨也豈可使端良之人取非僻之士然後謂非朋黨也陛下親行

堯舜之道高挹禹湯之德豈謂上與數千年堯舜禹湯
為黨是道德同也孔子聖人也顏回已下十哲希聖者
也更相稱贊為黨乎是道業同也仲尼祖述堯舜憲章
文武又曰吾不復夢見周公遠者二千年近者五百年
豈謂之黨是聖人德行同也後漢末名節骨鯁忠正儒
雅之臣盡心匡國盡節憂時而宦官小人憎嫉正道同
為構陷目為黨人遂起錮黨之獄以成亡國之禍備在
史策明若日月豈不為誠乎詩人嫉讒佞之人曰取彼

讒人投畀豺虎可謂三覆也上曰朕無疑卿等意況言朋黨未至公之道爾絳又對曰趨利之人常為朋黨以同其私故守正之人常遭搆毀以違其私故也小人多詐譖言常勝正人少機直道常不勝伏希陛下監其事情而察其言行則可矣

上御浴堂北廊召學士李絳對顧問畢上曰有一事甚異朕比來未能言之鄭絪身為宰相事朕不盡心朕與宰相商量欲詔盧從史却歸潞府續追入朝鄭絪輒漏

洩我意先報從史令其陳奏潞府無糧三軍且請山東
就糧為人臣豈合有此事耶故事合如何處置絳對曰
若實有此事雖以誅族於陛下未足塞責復曰陛下從
何得之計鄭綱必不自洩從史必不自言陛下先知何
以得之上曰告甫密奏絳對曰臣與鄭綱先後懸殊不
相往來臣約其事體必無此理鄭綱甚讀書頗識事體
時稱佳士素有美名雖不知其才術如何至於君臣大
義不合不知去就若身居宰叅陛下密謀便敢洩之於

奸臣雖術同犬彘性如梟獍亦不合至此況網頗知古
今洞識名節事出萬端情有難測莫不同列有不便之
勢專權有忌前之心造為此亂冀其去位若不過陳危
事安得激怒上心伏望陛下深賜詳熟無令人言陛下
惑於讒佞也上良久曰亦應如此朕幾誤為處分至是
遂已

憲宗時京兆少尹裴武銜命使鎮州令諭王承宗割德
棣兩州歸朝廷武飛表上言一如朝廷意旨遂除承宗

所署德州刺史薛昌朝為德棣節度令中使齎旌節授之而魏博田季安得飛報先知之遽報承宗言昌朝與朝廷通遂星夜追昌朝德棣州節度及旌節至魏州又為季安留連得為宴樂停七八日而昌朝尋已追到鎮州朝命遂不行比及武使回事宜與先上表參差并有人譖傷武云使回宿宰相裴垍宅遲明方見憲宗大怒乃召學士李絳因顧問奏對畢上顏色甚震怒曰裴武調我苟求脫禍於賊中上言不實令我制除薛昌朝今

果不受又使回未見先宿裴瑒宅須左除嶺南遠處絳
奏言裴武甚諳練時事往陷在河中李懷光賊中事跡
可稱今所銜命不合絕有乖錯大底賊多變詐難得實
情以臣愚慮思度王承宗恐國家必有征討請割德棣
兩州且得安全尚有四州之地亦足保其富貴求安之
計必是此心然鄰道魏博東平范湯與王承宗勢同事
等恐他時亦為朝廷所割必是為鄰道所構兼以利害
鼓動之不得守其初心此必然之理也伏望且尋訪之

裴武所上表只得上承宗初時意便且奏來後必恐鄰境脅制誘動遂有後變計裴武不敢不盡其心今陛下擇裴武使兇逆悖亂之邦一不如意便有貶責臣恐今後奉使賊中無復得誠實其後奉使者皆以武為誡依阿可否之間必曰其言及表章則如此其深心則臣不可保不可顯言是非陳列事狀若朝廷不得實狀別處置或有乖錯非國家所利也若受賊中財賂言語不實則須重責以懲姦欺又言先於裴均宅宿且裴武久為

朝官具諳制度裴垪身為宰相特受恩私必無未見而便宿宰相家固無此理昧劣於此兩人猶不敢至是況皆是詳練時事之人計必無此事必有構傷裴垪裴武陞下不可不察上良久曰誠有此理事合從寬更不用問武得守其位

武宗立召淮南節度使李德裕為門下侍郎同中書門下平章事既入謝即進戒帝辨邪正專委任而後朝廷治臣嘗為先帝言之不見用夫正人既呼小人為邪小

人亦謂正人為邪何以辨之請借物為諭松栢之為木
孤生勁特無所因倚蘿蒿則不然弱不能立必附他木
故正人一心事君無待於助邪人必更為黨以相蔽欺
君人者以是辨之則無惑矣又謂治亂繫信任引齊桓
公問管仲所以害霸者仲對琴瑟笙竽弋獵馳騁非害
霸者惟知人不能舉舉不能任任而又雜以小人害霸
也太玄德憲四宗皆盛朝其始臨御自視若克舜寢久
則不及初陛下知其然乎始一委輔相故賢者得盡心

久則小人並進造黨與亂視聽故上疑而不專政去宰相則不治矣在德宗最甚晚節宰相惟奉行詔書所與圖事者李齊運裴延齡韋渠牟等訖今謂之亂政夫輔相有欺罔不忠當亟免忠而材者屬任之政無他門天下安有不治先帝任人始皆回容積纖微以至誅貶誠使雖小過必知而改之君臣無猜則讒邪不干其間矣會昌中德裕論侍講奏孔子門徒事狀上言曰今月十三日於延英殿陛下謂臣等云侍講稱孔子其徒三千

亦可謂之朋黨臣等自元和以來嘗聞此說幸因聖慈
下問輒敢覲縷而言西漢劉向云昔孔子與顏回子貢
更相稱譽不為朋黨禹稷與皋陶轉相汲引不為比周
何則忠於為國無邪心也臣常以鯀共工讙兜與舜禹
雜處堯朝共工讙兜則為黨舜禹則不為黨何者共工
讙兜相與比周迭為掩蔽也如賢人君子則不然忠於
國則同心聞於義則同志退而各自行已不可交以私
是以趙宣子隨會繼而納諫司馬侯叔向比以事君不

為黨也公孫弘每與汲黯請間黯先發之弘推其後武帝所言皆聽汲黯雖與公孫弘並進然廷詰云齊人少情譏其布被為詐則知先發後繼不為黨矣國史稱太宗嘗與房玄齡圖事則曰非杜如晦莫能籌之及杜如晦至竟從玄齡之策此又同心圖國不為黨也何者為黨漢書稱朱博陳咸相為腹心背公死黨東漢周福房植各以其黨相傾議論相軋故漢朝朋黨始於甘陵二部及其甚也謂之鈎黨繼受誅夷以王制言之非不幸

也魏朝何晏丁謚依附曹爽祖尚浮虛使有魏風俗由茲大壞此皆為朋黨也略舉數節以明其類至於歷代朋黨不可殫言仲尼知季路之不免子游識子張之未仁曾子罪卜商喪親無聞夫子咎宰我鑽燧為久惡既不掩善固宜稱此又不為黨也班固稱周室既微由是列國公子魏有信陵趙有平原齊有孟嘗楚有春申抵掌而游談者以四豪為稱首於是背公死黨之議成守職奉上之義廢矣此四豪者各有門客三千而謂之黨

仲尼三千則不為黨蓋仲尼之徒惟務仁義不以爵祿為貴四豪之門惟務譎詐常以勢力相高今侍講欲以奔走權勢之徒攫挐名利之輩比方孔門上哲實罔聖聰臣未知元和以來所謂黨者為國乎為身乎若以為國則隨會叔向汲黯房玄齡之道可得行矣不必聚黨成羣以臣觀之今所謂黨者進則誣善蔽忠附下罔上歛歛相是態不可容退則車馬馳驅唯務權勢聚於私室朝夜合謀清美之官盡須其黨華要之選不在他人

陰附者羽翼自生中立者抑壓不進孔門顏冉豈有是哉陛下以此察之則姦偽自見臣恐更有小人妄陳此說輒舉事例庶裨聰明伏望陛下留臣此狀時賜覽閱所冀小臣瞽說免惑聖心臣不任懇激之至謹錄奏聞宋真宗咸平六年右諫議大夫田錫乞詢求將相狀曰臣嘗讀唐太宗實錄見李靖文武材畧隋將韓擒虎即其舅也靖每與擒虎論兵未嘗不稱善撫之曰可與論孫吳之術也初事隋為殿內直長吏部尚書牛弘見而

重之曰李靖王佐才也今國家自先帝平晉之後與突厥結隙將相舊人相次薨謝邊鄙間州縣屢為突厥所陷皇威不振久矣時議乃以將相無人亦久矣即不知今來朝廷公卿大夫間有如韓擒虎與李靖論兵否有人如牛弘知李靖有王佐才否若有人能論兵有人負王佐才未審陛下知之否有人善論兵有人負王佐才乃是帝王合先知之矣自來皇城司差人探事又別差探皇城司探事人如此察探京城民間事無鉅細皆達

聖聰近又差朝臣為巡撫使及差朝臣以點檢酒務名目出外採訪所採訪之事不過民間利病不過官吏能否而已即未聞委公卿大夫察訪善論兵之人詢求有王佐之才者也由是見所求者瑣屑而所忽者遠大也陛下若以宗廟社稷為憂以生靈為念即宜以遠大為務求將相急也臣每奉聖謨令陳鄙見仰祈英睿特賜披詳

仁宗時叅知政事范仲淹奏辯滕宗諒張亢疏曰臣聞

議論太切必取犯顏之誅保任不明豈逃累已之坐曩
典斯在具察式瞻臣自邊陲誤膺獎擢授任不次遇事
必陳竊見故監察御史梁堅彈奏滕宗諒於慶州用過
官錢十六萬貫有數萬貫不明必是侵欺入已及邠州
宴會并涇州犒設諸軍乖越不公至聖慈赫怒便欲罷
去臣緣在彼目擊雖似過當別無切害不曾有一兵一
民詞訟至於處置邊事亦無踈虞臣遂進諫乞聖慈差
官勘逐具與辯明未銷挫辱恐誤朝廷賞罰又有上言

張亢驕僭不公臣亦乞根勘辯明或無深過如有大段乖越侵欺入已臣甘同受貶黜臣所以激切而言者非滕宗諒張亢勢力能使臣如此竭力也蓋為國家邊上將帥中未有曾立大功可以威衆者且遣儒臣以經畧部署之名重之又借以生殺之權使彈壓諸軍禦捍大寇不使知其乏人也若一旦以小過動搖則諸軍皆知帥臣非朝廷腹心之人不足可畏則是國家失此機事自去爪牙之威矣唐末藩鎮多殺害逐去節度使於軍

中自立帥臣而當時不能治者由帥臣望輕易於搖動之故也今燕度勘到滕宗諒慶州一界所用錢數分明並無侵欺其毀却涇州前任公用厯勘到干連人只稱有送官員等錢物亦不顯入已又是元彈奏狀外事件所有張亢借公用錢買物事未發前已還納訖又因移任借却公用銀却留錢物准還皆無欺隱之情其餘罪狀多未據實其干連人當盛寒之月久在禁繫皆是非辜若令燕度勘問二人既事非確實必難伏辯或逼令

認罪又是陛下近臣不可辱於獄吏或至錄問有辭即須差官再勘其合干人當轉不聊生兼邊上臣寮見此深文謂朝廷待將帥少恩於支過公用錢內搜求罪戾欲陷邊臣且塞下州郡風沙至惡觸目愁人非公用豐濃何以度日豈同他處臣寮優游安穩坐享榮祿陛下深居九重當須察此物情知其艱苦豈可使獄吏為功而勞臣抱怨臣欲乞聖慈據燕度奏到事節特降朝旨差使臣二人齎去取問滕宗諒張亢如實是已犯便仰

承認當議量情親斷如別有緣由亦具分析聞奏候到
見得別無枉抑便可取旨斷遣如有異同即乞朝廷別
選官勘鞫免致冤滯其干連人且乞指揮放出知在臣
則已有不合保此二人罪狀乞聖慈先賜貶黜免令臣
包羞於朝受人指笑儻聖慈念臣不避艱辛尚留驅使
即於河東河北陝西乞補一郡臣得經畫邊事一一奏
論或補三輔近州臣得為朝廷建置府兵作諸郡之式
以輔安京師臣之此請出於至誠願陛下不奪不疑況

臣久為外官不知輔弼之體本是簾材祇堪犬馬之用
若令臣待罪兩府必辱君命且畏人言臣無任祈天望
聖請命激切屏營之至

仲淹又奏雪張亢疏曰臣昨日見樞密院進呈張亢所
奏曾將公用錢回易到利息買馬及交鈔乞與遊索之
人自甘伏罪乞不追究遊索之人取旨下燕度結案聞
奏臣伏觀編勅指揮若將公使錢回易到別物公用但
不入已更不坐罪其張亢所奏二事若未有發露乃是

自首縱已發露亦不入已合該上項編勅指揮臣昨與韓琦在涇州同使公用錢曾為慶州簽判祕書丞馬倩身亡本人家貧親老與錢一百貫文又涇州保定知縣大理寺丞劉龍禮丁父憂家貧起發不得與錢一百貫文又號州推官監環州入中陳叔度丁父憂家貧無依與錢五十貫文又進士黃通來涇州相看與錢五十貫文並是一面將公使庫錢回易到利息相兼使用即不曾侵使着係省官錢自來邊上有公使錢處為有前項

條貫及有回易利息但不入已各是從便使用今來若
依編勅施行則張亢自首與遊索人錢不曾入已又是
燕度元勘外事節朝廷自可指揮不須却送入紫魚恐
追尋元遊索之人或在遠方何時結絕若不用上件編
勅指揮則臣與韓琦亦有上件與人錢物罪狀須至自
劾昔人有言曰法者聖人為天下畫一不以貴賤親疎
而輕重也伏望聖旨送樞密院依詳編勅及將臣與韓
琦用錢事狀并張亢所奏二事一處定斷以正典刑

慶厯四年十二月知潞州尹洙論公論朋黨繫於上意
疏曰臣聞知賢而不能任任之而不能終於治國之道
其失一也去年朝廷擢歐陽脩余靖蔡襄孫甫相次為
諫官臣知數子之賢且久一旦樂其見用又慶陛下得
賢而任之所慮者任之而不能終爾以陛下知臣之明
脩等被遇之深豈有任之而不能終哉蓋聞唐魏元成
既薨文皇親為撰碑文以賜之後有言其阿黨者遂仆
其碑近世君臣相得未有如唐文皇與魏元成者間言

一入則存歿之恩不終臣未嘗不感憤嘆息而不能已也。以是而論則知任之為易終之實難可不慮哉。屬聞歐陽脩領使河北臣以邊任之重故不復以內外為疑。今又聞蔡襄出知福州未審襄以親自請為以過斥若以過斥豈當進其官秩。若以親請則襄在京師不三四年已再省其親士大夫去遠方而仕京師者孰不思其親豈獨襄得遂其私恩哉。則襄之不當出明矣。陛下優容諫臣在唐文皇上脩等之才雖不愧古人然所施為

未能少及於魏元成則間毀之言不必待其歿而後發也伏惟念知之之已明任之之已果而終之之甚難則天下幸甚然臣爰脩等之賢故惜其去朝廷而不盡其才如陛下待脩未改於初則臣有稱道賢者之美如其恩遇已移則臣負朋黨之責矣夫今世所謂朋黨甚易辨也陛下試以所進用者姓名詢於左右曰某人為某人稱譽必有對者曰此至公之論異曰其人或以事見疎又詢於左右曰某人為某人營救必有對曰此朋黨

之言昔之見用此一臣也今之見疎亦此一臣也其所
稱譽與營救一也然或謂之公論或謂之朋黨則公論
之與朋黨常繫於上意不繫於忠邪此御臣之大弊也
臣既為陛下建忠謀豈復顧朋黨之責但懼名以朋黨
則所陳之言不蒙見采此又臣之深慮也惟聖明裁察
焉

樞密使副陝西安撫使韓琦乞別白朋黨狀奏曰臣竊
聞已降詔書申誠朋黨此蓋陛下恢善治勸薄俗之深

意也臣輒有管窺之見少思開助聖明竊以自古迄今
人臣在朝有忠賢有奸邪有好公之人有挾私之黨既
為性之不同則各以類而相附大凡忠賢與好公之人
建一事補一官則必公其是非蓋是者言是非者言非
唯在於公故政化可興而邦家是賴此乃善者以類而
進不可謂朋黨若奸邪與挾私之人建一事補一官則
必私其是非蓋是者言非非者言是唯在於私致使白
黑不分而上蔽主聽者真所謂朋黨也在聖君審而察

之決而行之若有此等朋黨必望陛下重加貶責不可
務寬俾其忠賢與好公之人以類而進奸邪與挾私之
人以黨而退則朝廷清明朋黨自息也若但行詔諭未
賜別白臣恐天下搢紳自今而後欲建一善事稱一善
人必再三思之曰得無涉朋黨之迹乎則中道而止矣
縱有忠義之人不顧形迹建一善事稱一善人若惡之
者諧于上曰此朋黨之為耳則善事與善人皆廢而不
用矣惟陛下熟察而必行之天下幸甚

五年河北都轉運使歐陽脩論小人欲害忠賢必指為朋黨上奏曰臣聞士不忘身不為忠言不逆耳不為諫故臣不避羣邪切齒之禍敢干一人難犯之顏唯賴聖明幸加省察臣伏見杜衍韓琦范仲淹富弼等是陛下素所委任之臣一旦相繼罷黜天下之士皆素知其可用之賢而不聞其可罷之罪臣雖供職在外事不盡知然臣竊見自古小人讒害忠良其說不遠欲廣陷良善則不過指為朋黨欲動搖大臣則必須誣以專權其故

何也夫去一善人而衆善人尚在則未為小人之利欲盡去之則善人少過難為一一求瑕唯有指以為黨則可一時盡逐至如大臣已被知遇而蒙信任則難以他事動搖唯有專權是上之所惡故須此說方可傾之臣料衍等四人非有大過而一時盡逐弼與仲淹委任尤深而忽遭離間必有以朋黨專權之說上惑聖聰者臣請試辨之昔年仲淹初以忠言讜論聞於中外天下賢士皆爭稱慕當時奸臣誣作朋黨猶難辨明自近日陞

下擢此數人並在兩府察其臨事可以辨也蓋杜衍為人清脩而謹守規矩仲淹則恢廓自信而不疑琦則純正而質直弼則明敏而果銳四人為性既各不同雖皆歸於盡忠而其所見各異故於議事多不相從至如杜衍欲深罪滕宗諒仲淹則力爭而寬之仲淹謂契丹必攻河東請急脩邊脩富弼料以九事力言契丹必不來至如尹洙亦號仲淹之黨及爭水洛城事韓琦則是尹洙而非劉滄仲淹則是劉滄而非尹洙也數事尤為彰

著陛下素已知此四人者可謂天下至公之賢也平日閑居則相稱美之不暇為國議事則公言廷諍而不私以此而言臣見衍等真得漢史所謂忠臣有不和之節而小人讒為朋黨可謂誣矣臣聞有國之權誠非臣下之得專也然臣切思仲淹等自入兩府以來不見其專權之迹而但見其善避權也夫權得名位則可行故好權之臣必貪位自陛下召琦與仲淹於陝西琦等辭至五六陛下亦五六召之至如富弼三命學士兩命樞密

副使每一命未嘗不懇辭懇辭之者愈切陛下用之愈堅此天下之人所共知臣但見其遜避太繁不見其好權貪位也及陛下堅不許辭方敢受命然猶未敢別有所為陛下見其皆未行事乃開天章召而賜坐授以紙筆使其條事然衆人避遜不敢下筆弼等亦不敢獨有所述因此又煩聖慈特出手詔指定姓名專責其條列大事而行之弼等遲回近及一月方敢略陳數事仲淹老練世事必知凡事難遽更張故其所陳志雖遠大而

多若迂緩但欲漸而行之以久冀皆有效弼性雖銳然亦不敢自出意見但舉祖宗故事請陛下擇而行之自古君臣相得一言道合遇事便行更無推避臣方恠弼等蒙陛下如此堅意委任督責丁寧而猶遲緩自疑作事不果然小人巧譖已曰專權者豈不誣哉至如兩路宣撫國朝常遣大臣況自中國之威近年不振故元昊叛逆一方而勞困及於天下北人乘釁違盟而動其書辭侮慢至有貴國祖宗之言陛下憤恥雖深但以邊防

無脩未可與爭屈意買和莫大之辱弼等見中國累年
侵凌之患感陛下不次進用之恩故各自請行力思雪
恥緣山傍海不憚勤勞欲使武脩再脩國威復振臣見
弼等用心本欲尊陛下威權以禦四夷未見其侵權而
作過也伏惟陛下睿哲聰明有知人之聖臣下能否洞
見不遺故於千官百辟之中親選得此數人驟加擢用
夫正士在朝羣邪所忌謀臣不用敵國之福也今此數
人一旦罷去而使羣邪相賀于內四夷相賀於外此臣

所以為陛下惜之也伏惟陛下聖德仁慈保全忠善退去之際恩禮各優今仲淹四路之任亦不輕矣惟願陛下拒絕羣謗委信不疑使盡其所為猶有裨補方今西北二陲交爭未已正是天與陛下經營之時如弼與琦豈可置之閑處伏望早辨讒巧特加圖任則不勝幸甚臣自前歲召入諫院十月之內七受聖恩而致身兩制常恩榮寵至深未知報効之所今羣邪爭進讒巧而正士繼去朝廷乃臣忘身報國之秋豈可緘言而避罪敢

竭愚瞽惟陛下擇之

至和元年侍御史趙抃論邪正君子小人上言曰臣聞
欲治之主得人其昌左右前後皆盡賢正也謀謨讜言
皆盡延納也忠厚鯁亮之士日益招來便佞詭姦之徒
日益摧縮號令風化日益流布朝廷中外日益尊安若
然富壽之域坐躋太平之象立見噫左右前後一日不
得賢正之人而為之輔翼雖堯之癯瘠舜之孜孜夏禹
之克勤文王之不暇食末如之何也已漢劉向謂正臣

進者治之表正臣陷者亂之基誠哉是言也在易君子
道長小人道消於卦為泰其繇云上下交而其志通也
正臣非君子歟反是則於卦為否矣否之繇則曰上下
不交而其志不通內小人而外君子邪臣非小人歟此
言為天下者宜進君子而退小人也明矣谷永所謂帝
王之德莫大於知人者其有旨哉夫南面而聽天下也
公卿百執事雜然滿前孰為正孰為邪孰為君子孰為
小人在聖人明眎而聰聽之精擇而慎柬之真偽明白

人焉庾哉大抵輔相樞機之任得正人也得君子也然後同德而同心也則其下所謂邪者小人者靡然相與俛首帖耳以去而徘徊所留亡幾矣鑒觀古昔信史脩存有虞大聖人也任十六相世躋德美禱杭饗餐流寬四裔民至于今稱之亡窮周成哲王也善有旦奭則倚之不貳惡有管蔡則誅之勿疑故年七百而世三十也始皇惑高斯之佞不能奪忽叔孫之才不能與秦嬴之敗曾不旋踵元帝知恭顯之姦不能擯愛蕭望之之賢

不能用炎漢之運從而衰下唐太宗納房杜王魏之切
議誅侯君集張亮之兇僻遂成貞觀之治天皇聽敬宗
之附會戮無忌之忠良終有易姓之禍其後元振朝恩
之擅權元載盧杞之竊位代德之勢其危殆相繼不絕
如綫茲誠用人之得失莫不繫國之安危間分兩塗不
可不辨恭惟陛下以上聖之姿御神器之重開納忠讜
繼承祖宗數路以取人一德以求治然而邇來日星謫
見聖衷焦勞蝗潦為災民力彫弊帑庾空窘敵國窺覷

官冗兵驕風俗奔競今將治其弊安其危豈一人獨運
於巖廊之上而能致之哉當此時也謂宜博選忠直方
正能當大任世所謂賢人端士者速得而亟用之位于
丞疑輔弼之列朝夕獻替得嘉謀嘉猷發為號令使天
下耳目聞見太平之政在今日爾臣不勝大願願陛下
宸斷不疑舉正以却邪陟君子而黜小人有為於可為
之時無因循後時之悔則天下幸甚宗廟之靈社稷之
福此其時也臣遠賤之迹愚亡所能唯思死節一誠上

報陛下採擢覆幬之德萬分一二臣無任許國竭忠激
切待罪之至

至和二年知制誥劉敞論呂溱等補外上奏曰臣伏以
馭臣之道在分別邪正正臣當親而近之邪臣當踈而
遠之至於天下之人亦皆以此窺朝廷若正臣聚於朝
則姦雄屏息治平可望若邪臣聚於朝則僥倖競進頊
敗可待者不可勝察也臣伏覩朝廷太平積久賢能衆
多然其間邪正亦雜有之或愛君憂國公正發憤或朋

黨比周背公植私亦有循默自守不能為善又不敢為惡陛下臨御三十餘年矣以上聖之資監羣下所為固無遁形固無隱情然有可戒謹者在此而已比正臣常難進而易退邪臣常易進而難退何以言之正臣者惟義所在言則逆君之耳是所以難進也言或不用不欲自顯因事而去是所以易退也邪臣者惟利所在言則逢君之欲是所以易進也行雖惡不顧禮義名雖醜不知愧恥患失之耳是所以難退也此兩臣者願陛下參

伍觀之母使當親者踈當踈者親則朝廷尊榮而社稷安矣近者翰林侍讀學士呂溱樞密直學士蔡襄繼出典郡今又聞御史中丞孫抃翰林學士歐陽脩知制誥賈黯韓絳並乞補外此六人等皆有直質無邪心論議不阿執政有益當世者也誠不宜許之使四方有以窺朝廷而姦佞僥倖之雄因而競起此則邪正分別之一端也臣以孤拙忝侍從日夜思惟無以少裨聰明恐陛下忽於正臣之易退而忘左右前後直道之不容也臣

不勝其愚謹獻所聞惟賜采擇

言事御史馬遵論欲用忠賢當去左右之私言上奏曰
臣聞自古人君皆欲求忠以自助求賢以自為然而治
少而亂多者蓋其所謂忠者不忠而賢者不賢也故知
人則哲堯舜其難今陛下至仁求治堯舜之用心也其
於知人亦不為易必欲得忠賢而用之莫若去左右之
私言采中外之公議則其人可知矣知而用之則朝廷
無事而天下太平矣狂言聖擇或補萬分

英宗眷遇右司諫同知諫院傅堯俞嘗問曰多士盈庭孰忠孰邪堯俞曰大忠大佞固不可移中人之性繫上所化英宗納其言

神宗初立以吳奎為參知政事時已召王安石辭不至帝顧謂侍臣曰安石歷先帝朝召不赴頗以為不恭今又不至果病耶有所要耶曾公亮曰安石文學器業不敢為欺奎曰臣嘗與安石同領郡牧見其護前自用故為迂闊萬一用之必紊亂綱紀乃命知江寧奎又嘗進

言陛下在推誠應天。天意無他，合人心而已。若以至誠格物，物莫不以至誠應。則和氣之感自然，而致令民力困極，國用窘乏，必候順成，乃可及他事。帝王所職，惟在於判正邪。使君子常居要近，小人不得以害之，則自治矣。帝因言堯時四凶猶在朝，奎曰：四凶雖在，不能惑堯之聰明。聖人以天下為度，未有顯過固宜包容，而不可使居要近地。爾帝然之。

帝召問集賢校理開封府推官滕元發治亂之道。元發

對曰治亂之道如黑白東西所以變色易位者朋黨汨之也帝又曰卿知君子小人之黨乎曰君子無黨辟之草木綢繆相附者必蔓草非松栢也朝廷無朋黨雖中主可以濟不然雖上聖亦殆帝深以為名言太息久之熙寧初王安石為翰林學士一日講席羣臣退帝留安石坐曰有欲與卿從容論議者因言唐太宗必得魏徵劉備必得諸葛亮然後可以有為二子誠不世出之人也安石曰陛下誠能為堯舜則必有臯夔稷禹誠能為

高宗則必有傳說彼二子皆有道者所羞何足道哉以天下之大人民之衆百年承平學者不為不多然常患無人可以助治者以陛下擇術未明推誠未至雖有臯夔稷禹傳說之賢亦將為小人所蔽卷懷而去爾帝曰何世無小人雖堯舜之時不能無四凶安石曰惟能辨四凶而誅之此其所以為堯舜也若使四凶得肆其讒慝則臯夔稷禹亦安肯苟食其祿以終身乎

熙寧元年安石論孫覺令吏人書寫章疏上奏曰臣今

日蒙宣諭以孫覺令吏人書論列大臣章䟽臣初亦怪其不能謹密但疑此朋友所當誨責非人主所當譴怒既又反覆思惟陛下以覺為可聽信故擢任諫官進賢退不肖自其職分所當論列雖揚言於朝以廸上心於義未為失也但令吏人書寫章䟽誠不足以加譴怒凡人臣當謹密者以君子小人消長之勢未分言有漏泄或能致禍如其不密則害將及身若遭值明主危言正論無所忌憚亦何謹密之有乎唯有姦邪小人以枉為

直懼為公論之所不容則惟恐其言之不密若得此輩
在位陛下何所利乎若陛下疑覺有交朋黨之私招權
之姦則恐盛德之世不宜如此魏鄭公以為上下各存
形迹則國之興廢或未可知若陛下不考察邪正是非
而每事如此猜防則恐善人君子各顧其迹不敢盡其
忠讜之言而姦邪小人得伺人主之疑以行讒慝也若
陛下恐陳升之聞此或不安臣亦以為不然漢高祖雄
傑之主也然鄂千秋論相國蕭何功次而高祖不疑乃

更加賞亦不聞蕭何以此為嫌陛下聖賢高遠自漢以來令德之主皆未有能企及陛下者每事當以克舜三代為法奈何心存末世徧吝之事乎書曰任賢勿貳去邪勿疑不明知其賢而任之以為賢不明見其邪而疑之以為邪非克舜三代之道也陛下以臣為可信故聖問及之臣敢不盡愚今日口對未能詳悉故謹具劄子以聞

上嘗從容語及知人之難右正言俱諫職孫覺曰克以

知人為難終享其易蓋知人之要在於知言人主用臣之道任賢使能而已賢能之分既殊任使之方亦異至於所知有限量所能有彼此是功用之士也可以處外而不可以處內可以責之事而不可以責之言陛下欲興太平之治而所擢數十人者多有口才而無實行臣恐日浸月長彙征牆進充滿朝廷之上則賢人日去正人日遠其為禍患尚可以一二言之哉願觀詩書之所任使無速於小利近功則王道可成矣

覺又上奏曰臣前日獲奉清光親承聖諭以知人為難
臣時倉卒以對不盡所懷退竊私喜聖諭及此則以同
符帝堯天下幸甚夫堯以神明之德睿聖之資而以知
人為難故四凶彛禹雜處其朝而終能辨之知所信任
蓋天下之事難之則易易之則難堯以知人為難故終
享其易而成巍巍之功季世之君易於知人信任偏蔽
以致裊敗者不可勝數臣竊惟孔子曰不知言無以知
人中庸曰取人以身脩身以道然則知人之要在於知

言知言之方在於修身而務學群臣進見者其言亂雜而不一其情隱伏而難知倉卒須臾之間未可以試之而見也人主苟能貫乎聖人之道通乎天下之理則言出而知其所指事至而要其所歸譬之權衡不可欺以輕重法度不可欺以長短苟為不學而燭理不明物來則眩矣尚何人之能知哉陛下躬上聖之資兼孔孟之業固足以燭萬務而察群下之情臣願陛下益聞所未聞見所未見使天下之理明白昭晰心如定鑑不將而

不迎則賢不肖判然君子小人辨矣惟留神財幸

二年覺又論不當召對小臣詢兩府臺閣人物上奏曰
臣聞近者召對臣僚雖或踈遠微賤陛下亦霽天威賜
以清問此固聖主好問盡下推誠不疑甚盛之德也或
聞進對之間陛下時時論及人物上自兩府大臣下至
臺閣新進使之區處題品此雖陛下廣其聰明不專一
人之言以為信但欲周知羣下之智能長短情狀曲折
然臣竊以謂知人堯舜所難孔子亦曰不如鄉人之善

者好之其不善者惡之得對之人未必皆賢而公其好惡就令才識可采亦未必盡知人之明問答之際陛下不能不微見聖懷流俗之情多事容悅度所喜者飾其賢觀所惡者詆其醜或陛下少加酌對必漏其所言大臣聞之必懷顧慮小臣聞之必事朋黨臣以謂人主不得不知羣臣之忠邪人才之高下苟於侍臣從官之中忠信篤實而好惡不私材資敏明而鑒裁不眩者時賜考察參伍其人亦不至於失士

知諫院楊繪上奏曰臣竊以人君之所難者其惟知人
乎人藏其心非察其言之可米必觀其行必試其事然
後其才能可得而用矣虞書曰萬邦黎獻共惟帝臣惟
帝時舉敷納以言明庶以功車服以庸此之謂也恭以
百寮轉對不行者十數年陛下即位首復其事此真明
目達聰兼視廣聽之術也然而止取其名乎將取其實
乎如取其名則書之史冊傳之四方亦足以為美矣如
取其實則今之轉對者前一日入奏于上閣至其日再

拜於上前而退則所奏之事有可採者或假手於人若因而進用之則偽濫者何由而旌別乎欲乞先觀其言設有可采即於轉對之時召而訪以事閱其能否真偽之狀既審其可用仍未可以言而遽進之先命之以事而觀其才用之實而擢於位如此則敷奏以言明庶以功車服以庸之典復行於今日

四年繪權御史中丞又上奏曰臣竊以知人之難雖聖人不免有失如堯之為君可謂聖人矣禹曰知人則哲

能官人惟帝其難之能哲而惠何憂乎驩兜何遷乎有
苗何畏乎巧言令色孔壬此言堯亦難乎知人也如孔
子之為師可謂聖人矣曰以言取人失之宰予以貌取
人失之子羽則孔子亦難乎知人也夫知人之道古聖
人以為難而不免有失則今之人不逮於古聖人者其
得自謂無難無失乎然在察於衆而不以一己之愛憎
而定人之賢否則知人庶乎其無失者矣恭惟陛下聖
德天縱負知人之哲苟知之則用之無不當然天下百

官之衆豈能盡出於聖知乎則必責在宰相也今居宰相之任者獨王安石臣謂其人之文章之德行之政事信為宰相唯於知人之道或恐不能無失焉以臣之愚而觀之其得失在於以一己之愛憎而定人之賢否而已臣請以既往之事明之只如呂公著者王安石始而愛之遂力薦之以為天下之賢也一旦言青苗不便終而憎之遂力排之以為天下之不賢也陳升之者王安石始而愛之遂力薦之以為天下之賢也一旦言乞罷

條例司遂力排之以為天下之不賢也韓絳者王安石始而愛之遂力薦之一旦於陝西捲助役錢榜終而憎之遂力排之以為天下之不賢也薛向者王安石始而愛之遂力薦之以為天下之賢也一旦言助役錢不便終而憎之已沮之劾之矣非遠必將力排以為天下之不賢也至於李常之類不可勝紀其始徇我則愛之薦之以為賢其終違我則憎之排之以為不賢知人之道豈若是哉然既往之事不足復議臣之所憂者在於將

來也安石之位今已為宰相則尊於往時矣其勢也漸而專矣人知徇之者得路則刻薄者望風而進矣人知違之者得怒則阿諛者登門而附矣以阿諛而被用者唯富貴是圖必無正人之理以刻薄而受知者唯沽激是務必無愛人之道戾之者日去順之者日衆戾之者日去則其間或有守之君子也順之者日衆則其間或詭隨之小人也陛下之任安石也如此而安石不能知人愛人之徇已也而憎人之違已也如此雖陛下保安

石必不作過若萬一有擅權專恣之事既附之者衆而無敢違之者則陛下何由而知乎縱安石實不作過若萬一有思慮不及之政事而行之有害於時者何人敢與安石言之乎觀其愛人之徇已而力薦之憎人之違已而不肯用雖有敢言之者安石其肯舍已而廻乎上孤而下執臣之所憂在乎將來者此也臣願陛下體察安石於知人之道未盡凡百除注無只信其愛憎而更參之於衆人則天下幸甚臣未受命為御史中丞以前

未嘗敢以一言上聞誠知陛下信之之篤徒以取憎於執政也今既受命為御史中丞矣則不憚誅謫而言之乃其職爾臣每聞其門下人議論但稍有違安石意者遂相與呼為流俗之議也以今觀之流俗之議安可忽諸無使將來之視今日或有如今日之視去年也邊事外也民政內也外憂如皮膚內患如心腹可得謂之必無矣臣謂今日之後只有順之者而無復有忤之者不同於既往也乞陛下以宗廟社稷為念以天下生靈為

念而無重違安石一人之意凡百除注或有未得知人之美者乞參之於衆人或出於聖斷裁正之

三年知開封府鄭獬上奏曰臣比者進對伏蒙陛下稱臣攝尹京府為治甚好百姓便之臣內惟承乏纔四十餘日實無善狀可副陛下褒諭之意故不敢祇拜以謝又以隆暑日旰不敢久對是以私懷鬱塞恐慄而不安臣才能朽下安能治劇夙夜勉強粗免罪戾若曰百姓便之萬無此理且所謂便之者蓋知其閭里之疾苦除

弊興利使元元之衆去愁歎而就安佚庶乎可也今臣
於此未有毫髮則百姓何便之有然不識陛下從何而
得之陛下聰明好問繇逮訪於下多言者或以此譽臣
此妄譽也當其進言時陛下何不使條臣所行便民之
事彼必窮而無對設使有對且實則陛下亦當深察之
然後以為信今臣無是而陛下遽信之如有以臣不肖
而毀之者陛下亦必聽之矣何則善惡之來不考其實
既容妄譽必亦容妄毀此臣不敢喜而有懼也昔者列

子居鄭客有言之於鄭子陽子陽遺之粟列子再拜而辭曰君非自知我也以人之言而遺我粟至其罪我也亦必以人言則吾所以不受也臣雖至愚安知陛下不以妄毀而黜臣哉故帝王聽納之際不可不察不察其實則天聽可得而欺姦臣乘之以逞其欲於是以白為黑以是為非附已者進背已者斥分布朋類彌縫其失使朝廷之上惟聞黨人之論而不知有天下公議善乎孟子之言左右皆曰賢未可也諸大夫皆曰賢未可也

國人皆曰賢然後察之見賢焉然後用之左右皆曰不可勿聽諸大夫皆曰不可勿聽國人皆曰不可然後察之見不可然後去之如此則當進者無苟得之幸當退者無私歎之恨進退各當其分又孰有致疑於其間者哉伏願陛下高視遠照毋牽私言使天下曉知毀譽之不能亂政則非獨臣之願實天下之願伏候進止

辯又奏曰日者陛下陞黜大臣出於獨斷二府不得與謀中外聞風莫不震動伊鬱之士至有通夕不寐拊髀

而起躍者以為自天禧已來五六十年間未有此等事
據祖考之宿憤快四海之公議則孤立特出之臣可以
出氣以高眦於天地間矣然而慶於始者未必不憂於
後見於微者未必不昧於著今進退之柄在於宰相無
雄傑跋扈之志竊取其柄以植私家故陛下下日攝而
歸已此不為難而所以為難者乃在知人昔堯之聖猶
曰知人惟帝其難之則自堯而後愈為難矣今賢不肖
雜然以進深情厚貌言與行違陛下雖聰明焉能探其

肝膽而辨其真偽乎辨之術則莫若試之凡陛下所得士未宜便賜褒擢如曰我能治民則且試之治民如曰我善治財則且試之治財如曰我善為禮則且試之為禮如曰我善為樂則且試之為樂凡其所長者宜從其長而用之用之有效群臣以為然未也大臣以為然亦未也陛下察之見其有效然後賞之如其不然則宜黜之賞罰明而人自勸雖堯舜不踰於此則其知人者豈不為難乎既用其賢矣時以不肖者參焉既用其智矣

時以愚者參焉於是黑白淆亂邪正倒置則天下之事
去矣昔者秦始皇自侈以為天下無賢及漢祖之起蕭
張韓黥乃秦之棄士也隋煬帝自大亦以為天下無賢
及唐宗之起而房杜英衛乃隋之棄士今天下之廣豈
無賢者惟無棄士以資後人乃幸矣然陛下既得士宜
用其所長在三司者則宜擇錢穀吏尹京者宜擇通政
事之臣在御史宜擇強毅之臣在侍從宜擇文學通古
今之臣如此則才盡其所蘊而官宿其所業天下之事

不舉者未之有也故舜之命夔典樂則不復典禮命禹作司空則不復作司徒命稷播農則不復作士以夔禹之賢而不能兼二事況以庸庸之材而欲兼天下之任可乎故今世不為官擇人而為人擇官惟履踐之多則為大臣不問其治與不治此天下所未能沛然也今天下之士如有自薦或因大臣所舉且試召之使論其事而觀其蘊然後命之以職試其所為如此則焉廋哉

御史知雜劉述乞假監司之權令察守令狀曰臣嘗謂

天下守宰如一得人則和氣可以立召太平可以力
致不為難也何以言之朝廷若差除守宰多限以資級
不能周知其人善惡及臨事之際方見其才之短長德
之良否耳能周知而習見者必也監司之官乎設有一
人其資性既醇謹其持身亦清廉奈何才識短謬不能
燭知義理區別淑慝而使之居守宰之任則下得侵其
權吏得縱其姦蚩蚩細民受弊而無告矣復有一人狡
猾貪污而能屬託吏胥彌縫上下陰為姦賊不見其迹

斯二人者人皆知其不可以長民矣而為監司者雖欲發擿而斥逐之而無實狀可得且復懼為反噬隱忍而不敢為間或能直以不才貪猥之說聞于朝廷萬一聽而罷黜之旋踵之間則冤愬之聲已聞於上矣醜言巧詆隨而加諸朋姦之人互為梯援無幾何則職任復舊矣彼監司者懲其若是既不能有所裨益不若苟簡循默之為宜也為監司計則得矣為朝廷計則非天下之福也伏望聖慈深鑒此弊少假監司之權使得竭忠悉

慮精察守宰有如前所謂二人者為衆所惡當深譴而痛繩之投諸四裔可也終身不齒可也而其事權可作假借之乎監司得其權則郡縣綱紀既舉而民受其賜矣然則監司事權朝廷既假借之則推擇之間不可不審也願陛下深詔政府精選轉運使提點刑獄唯人是求不必限以資序即得其人矣可以責之力振風教審覈官吏使弱不勉者不敢怠其職剛暴失中者不敢肆其情農桑勸而孝悌興徭賦均而獄訟息然後間下特

旨令於守宰中擇有豈弟之政吏畏而民愛事狀灼然者三兩人密加薦拔特與增秩賜金使之再任或陞擢任使如此則郡縣有中和之政監司有澄清之功行之不疑當見其効

元豐間以司徒致仕富弼論辨邪正上奏曰臣伏蒙聖造擢冠宰司雖步履尚艱稍稽入覲屢得寬告跼私門然不敢安居常思當今切務欲伸報塞而事頗紛紜固非筆墨可盡今且以一事最大者仰塵天聽伏惟聖

慈更賜裁察夫君臣之道本是一體君者元首也執政者股肱心膂也諫臣御史侍從論思者耳目也內外羣有司者筋肌支節血脉也體若具備方能成人為君者上下之官亦具而無闕方能成國者正如為人之體也人之體一脉不和則為疾矣君之國一官不和則為害矣體之不和為疾最大者股肱心膂也國之不和為害最大者執政也夫執政者輔贊萬機為國大臣日至君前議論天下大事賞善罰惡進賢退不肖喜怒繫乎人

情之舒慘邪正繫乎朝廷之盛衰是執政者天下之所
觀望羣有司之所師表也執政不和則羣有司安得而
和哉群有司不和則萬務安得而治哉萬務不治則天
下之民受其弊矣民既受弊則國家衰亂隨之此萬萬
必然之理也是故為國者欲求治且安非天下人和不
可也欲天下和非執政先和不可也執政者乃朝廷教
令之所出而天下治亂之所繫也安得不和也尚書臯
陶曰同寅協恭和衷哉周武王曰紂有億兆夷人離心

離德予有亂臣十人同心同德康王曰三后協心同底
于道夫三后皆當時聖賢此足見聖賢若不和亦不能
同致其道也且夫執政者和則類無猜嫌所論皆合事
必極其理盡其善然後行下人固悅服而稟從之承流
宣化風動草偃遂使天下蒙其利則豈有不治而安者
乎及其至也乃能致昇平而令國家享祚於數百年者
矣昔西漢陳平為右相周勃為左相既誅諸呂平以勃
功高遂以右相推勃及平對文帝決獄治粟事有條理

勃自知能不如平復推平為右相也唐太宗召宰相房
喬以杜如晦能斷大事如晦復謂喬善嘉謀而太宗卒
用喬策茲四相者非用心至和以天下為任安肯互相
推薦為國遠慮如是其切而不自爭勝耶此乃臣前所
謂執政者和則致時昇平使國家享祚數百年之明効
也若執政者不和則議事之間動有疑貳或忿爭於官
府或辨列於君前咸蓄不平之心必無至當之論假使
強自牽合終成乖戾互相厭苦終致傾擠門下賓朋助

為搖撼彼此窺伺是非紛拏忿逞私憾之讎何卹公家
之事既行於下人不悅服而不肯稟從淪胥展轉遂至
天下受其弊則豈有不衰而亂者乎其甚者至有賈禍
召亂為國大患而不可救者矣昔唐憲宗相裴度時方
鎮跋扈度勸帝用兵諸道叛亂者悉皆歸服憲宗遂成
中興之業王室大振既而悞用李逢吉大姦邪嫉度功
業令門下朋黨號八閹十六子者興造謗訕百般中傷
以至撰作謠讖謂度有天分憲宗既惑度遂罷去尋致

河朔徐汴再陷賊庭王室復弱矣僖宗用鄭畋盧攜為相爭黃巢邀請節旄事攜以畋語至切遂拂袂投硯而起喧於都下然衆議畋語為是攜議為非時又用宰相王鐸為都統出討黃巢攜大不悅益固執不與巢節旄只授以率府其意欲激黃巢之怒使鐸不成以快已志殊不以天下安危為慮而僖宗不明終用攜議巢果大怒擁衆百萬自嶺表橫行天下是時大亂無一州一縣不用兵者俄而兩京陷沒僖宗幸蜀生民塗炭之極自

古無比久之巢雖漸敗而朱溫自巢軍投來終移唐祚
自號大梁茲二相者營私徇已用心不公擠陷忠良敗
壞時政或翦弱王室或覆亡宗社為臣至此墮族何償
此臣前所謂賈禍召亂為國大患而不救者之明效也
以此足見執政者和與不和實繫乎天下治亂之本存
亡之機也如人股肱心膂之病可以喪其生也至於諫
官御史侍從論思及內外羣有司者亦不可謂其職小
而容有不和也苟有不和則如人耳目筋肌支節血脉

之疾安得為其小而不治之使和平哉周武王曰紂有臣億萬惟億萬心予有臣三千惟一心夫三千者舉其內外官也成王曰庶官惟和不和政厖禮曰和者天下之達道也漢劉向亦曰衆賢和於朝則萬物和於野昔賢又以烹調鼎鼎更張琴瑟操執轡馭合煉藥石設於方以為諭者或大或細未有不以和為主也為君者不可不察也不可審其所擇也夫內外大小之官所以致其不和者何哉止由乎君子小人並處其位也蓋君

子小人方圓不相入曲直不相投貪廉進退不相侔動靜語默不相應如此而望議論協和政令平允可得邪安可幸而致邪易泰卦君子道長小人道消則時自泰矣否卦小人道長君子道消則時自否矣若使君子小人並位而處其時之否泰必無兩立之理君子常寡小人常衆則小人必勝君子不勝君子不勝則奉身而退樂道無悶萬一小人不勝則陰相交結互為朋蔽駕虛鼓扇白黑雜揉千岐萬轍眩惑主聽必得其勝而後已

小人既勝則益復肆毒梟心虺志無所不為所以自古
泰而治世少否而亂世多者亦止乎小人常勝君子常
不勝之所致也小人但能亂不能致治若小人或能致
治則易更九聖必不於小人道長之時謂之為否也凡
六十四卦三百八十四爻大抵諸聖以意象配君子小
人而為善惡至多不可悉數也易曰小人不耻不仁不
畏不義不見利則不勸不見威則不懲夫小人者聖賢
無不鄙而惡之故易曰小人而乘君子之器盜思奪之

矣詩曰憂心悄悄愠於羣小此皆聖賢鄙惡小人之甚者也書曰君子在野小人在位民棄不保天降之咎此謂用小人則民叛而天降災也仲尼曰君子中庸小人反中庸荀子亦曰君子小人相反也夫小人所為既與君子相反戾則安可使之並處哉所議安能得其協和哉夫天子無官爵無職事但能辨別君子小人而進退之乃天子之職也自古稱明王明君明后者無他惟能辨別君子小人而用舍之方為明矣至於煩思慮親細

故則非所以用明之要也夫前車者後車之所望也古
事者今事之所鑒也仲尼刪書於堯舜大禹皆稱曰若
稽古傳說戒高宗亦曰事不師古以克永世匪說攸聞
恭惟皇帝陛下稟上聖之資嗣累朝之業績服未久勤
勞已至更望考前世盛衰治亂之迹近代安危存亡之
機凡於選求力辨邪正所喜者未可遽用所怒者未可
遽棄之禮曰愛而知其惡憎而知其善者是也又人所
毀者未必為惡人所譽者未必為善仲尼曰衆惡之必

察焉衆好之必察焉者是也孟子尤於進退之說至詳齊宣王問曰吾何以識其不才而捨之孟子對曰國君進賢如不得已將使卑踰尊踰戚可不慎歟左右皆曰賢未可也諸大夫皆曰賢未可也國人皆曰賢然後察之見賢焉然後用之左右皆曰不可勿聽諸大夫皆曰不可勿聽國人皆曰不可然後察之見不可焉然後去之夫一國之人皆曰賢皆曰不可亦不可以謂之出於衆議而不可不從之也孟子尚以謂未可信而進退

之猶復躬自察焉直俟王親見其果賢則用之親見其果不可則去之此所以大防姦人朋比毀正譽邪也亦所以防偏見者以丹素甘辛而好惡之差也盖恐用捨或爽則所損多也實慎之至也苟如是而失之者尚恐不免然亦鮮矣陛下君臨天下必不得如孟子之辭盡聞天下所議論若夫左右之說及在廷諸人之語則皆可聞之矣然固未可遽信而遽行更在博詢而參校之也所詢者須詢於可詢者也詢之必不肯誤陛下也若

詢及姦險浮薄不正之人則向所謂愛憎毀譽偏見者
皆有焉有之則邪正錯亂是非混淆陛下至英至睿亦
莫得而辨之也茲事雖自古聖王亦以為至難臯陶曰
在知人在安民禹曰惟帝其難之帝謂堯也仲尼獨取
堯舜比之如天尚以知人安民為難況自堯而後者哉
由是而語陛下可不慎之慎之又慎之大抵有天下者
得人則治而安不得人則亂而危至甚則又繫乎存亡
也臣前所援據特一二而已但且欲證臣狂瞽非臆說

也其在方策者比比皆是不可殫引陛下開卷則見之矣惟望慎之慎之又慎之也臣昨蒙陛下召從僻左之外起於衰病之中祇是念其舊人授以國柄辭不獲免夙夜驚惶若非傍假衆賢共成大政則臣虛薄老朽立見敗事況夫四海至廣萬機至煩更藉天下之才以濟天下之務所以不避煩瀆之罪願陛下持古鑒今選賢與能者乃犬馬之至誠也惟聖情開納則非臣之幸乃宗廟之慶生靈之福也臣死罪死罪

彭汝礪論列樂士宣等奏曰臣伏覩禹戒舜曰慎乃在
位帝曰俞禹曰安汝止臣竊惟舜在深山之中聞一善
言見一善行沛然行之若決江河克歷試諸難登陟帝
位聰明睿智足以有臨禹猶訓戒之安其好惡之所止
蓋雖聖人未能無過賴左右正人昌言嘉謀以補闕失
恭惟陛下聽政之初與大臣論大行太皇太后盛德自
古無也謚法數字豈能盡有以知陛下以儉素為高行
以愛民為先務權知開封府錢勰持䟽決上前陛下乃

問災傷審盜賊詢禁繫有以知陛下明治道之大體吏部侍郎引見改官選人內有決殺人者乃命展一任有以知陛下存好生之德意聖語一出疾於郵置之傳中外臣庶罔不悅服實社稷之長福天下之至願也近聞樞密院劄子發遣左藏庫副使京東西路都監樂士宣供備庫副使滑州管勾浮橋黃經左藏庫副使催促裝卸石段王臨西京左藏庫副使山陵修奉所勾當蘇珪等赴闕並特與入內侍省東頭供奉官寄資供職方

陛下獨覽萬機九州四海羣黎百姓拭目傾耳以俟陛下之施為以窺陛下之好惡宮闈洒掃之臣內外侍省豈乏是哉臣俯伏思惟明道年中章獻明肅皇后上仙七日仁宗皇帝召見李迪起復章得象聽政五日詔內外母得進獻以祈恩澤及緣親戚以通章表若傳宣有司實覆奏內降除官及與差遣即未得行裁抑僥倖中外大悅未御正殿召宋綬于河南還范仲淹于重州黜內侍江德明羅崇勲等于外仁宗臨治之始能安其好

惡之所止動則天下丕應在位四十二年以昭受上帝
之休陛下勉聽羣臣之請躬臨正宁未聞褒召賢德旌
顯端士亟還頗僻已試之內臣非所以示美德於天下
臣竊為陛下惜陛下留神大禹戒舜之言若稽仁祖聽
治之意令士宣等各歸本任仲虺稱湯之德曰改過不
吝故能聖敬日躋為百世之盛王惟陛下財擇幸甚臣
謬職從官與侍經幄苟有所見豈宜緘默僭冒上陳冀
聖德萬一之助臣無任惶懼戰越待罪之至謹錄奏聞

汝礪再論列樂士宣狀奏曰臣今月初五日論列樂士
宣等事理未聞指揮施行臣俯伏惟念大行太皇太后
奄棄大養陛下初攬政事唯登進正直斥遠姦邪講求
國弊咨究民瘼是朝廷之先務天下之願望也陛下曾
未及此亟召士宣等赴闕及王穀之徒入內殆非仁宗
皇帝聽政家法中外臣庶為之太息陛下好惡之端輕
發於此纖猾小人將投間而亂政此天下治亂之幾社
稷安危之漸不可不深思而熟計之臣所以不避鉞斧

之誅冒聞天聽書曰有言逆于汝心必求諸道有言遜于汝志必求諸非道伏望聖慈特留睿念廣克帝捨已從人之量虛商湯從諫弗拂之心早賜指揮檢會臣前奏付外施行臣不勝大願干冒宸嚴臣無任惶懼戰越待罪之至

元豐元年知樞密院事呂公著乞選用前日議論之人不終遺棄上奏曰臣聞臯陶陳謨以知人為難孟子論道以知言為要所謂知人則哲能官人何憂乎驩兜何

畏乎巧言令色孔仕者知人也諛辭知其所蔽淫辭知其所陷邪辭知其所離遁辭知其所窮者知言也故曰帝王之德莫大乎知人而成敗之機在於察言是以堯舜在上明目達聰詢四岳以難任人命納言以聖讒說使惡直醜正者不能亂天下之俗服讒蒐慝者不能遷人主之意然後四門穆穆而朝廷清明權歸於上而天下無事臣向蒙陛下擢在樞府中謝曰不敢縷陳細務輒論及判別忠邪之道嘗謂陛下勵精為治十年不懈

小大政事日欲增葺而朝廷之間邪說尚勝大抵小人之害君子必求要切之語以中之使之不能自解方朝廷修改法度之初凡在朝野孰無論議陛下聖度兼包豈嘗記錄而小人賊害指目未已苟昔有異同之論而今不為言者所容則必指以為沮壞法度之人不可復用非陛下加意省察則端人良士類遭排格當時粗陳此語陛下頗賜開納近日除顧臨開封府推官程顥判武學縉紳聞之皆以為顥昔任御史嘗有所言陛下不

以為過有稍用之意朝廷用人不終遺棄必料傳之四方士人無不欣仰然命下數日復因言者而罷去則知臣前所陳者其風猶未殄也臣實不佞嘗為一二識者私道陛下盛德竊以為陛下春秋鼎盛履崇高之位操生殺之柄而記人之功忘人之過極天地山海之量此羣下以愛戴而人人願立於朝也小大之臣雖姦回頗僻如鄧綰者猶降責不踰年遽復侍從授以方面則是盛明之世本無棄絕之人邪正賢不肖亦未易以一言

而定也臣愚以謂今日公卿士夫嘗於朝廷法令有所
可否然其愛君許國之心愈久而益明者甚衆其唱和
雷同承迎附會而姦言汙行卒為陛下所照者蓋亦不
少然則人固未易知而士亦不可忽也況如顯者陛下
早自知之其立身行己素有本末講學論議久益疏通
且其在於言路之日時有論列皆辭意忠厚不失臣子
之體使得復見用於聖世其奮身報國未必在時輩之
後兼所除武學差遣亦未為仕宦之要津而小人斷斷

必以為不可者直欲深梗正路廣沮善人其所措意非
特一二人而已臣區區所慮者讒說殄行之徒日以熾
盛則守正向公之士愈難自立其於聖政不為無損臣
受恩與常人不同苟有所當言不敢顧避緘默以負陛
下優遇惟陛下幸察



歷代名臣奏議卷一百五十四